

Meoiryn Shee as Maarlee

Ho Ho son ny maarlee
Ny meoiryn shee 's ny maarlee Ho Ho!

Ayns Lunnin, shoh ny meoiryn shee,
Ta coadey shin dy mie.
As oie as laa
Son tey t'ad paa,
As gobbraghey dy creoi.

Ayns Lunnin, ta ny maarlee shoh
Geid cooid jeh sorçh erbee.
My vees ee jesh,
T'ee geidit, eisht
Ersooyl lhieu thie lesh bree.

Ho Ho son ny maarlee
Ny meoiryn shee 's ny maarlee Ho Ho!

Meoiryn Shee as Maarlee

Smessey jeu ta Greimmeyder Dan,
As eh ny ghooiney sie.
T'eh geid cho wheesh,
As peesh lurg peesh,
T'eh lhieney van cooid thie.

Ta Glackeyder Jack as Billy y Phoagey
Ayns y skimmee shoh.
As Horace y Chass,
As Maurice y Vass,
As Mwarree Swagg neuchoar.

Ho Ho son ny maarlee
Ny meoiryn shee 's ny maarlee Ho Ho!

Gyn boirey, yinnagh ad shoh loght,
Geid y bee veih lhiannoo boght.

Eer veih maarliagh goll dy lhie –
V’ad spooilley spooilley ass e hie.

Cha row veg sauçhey, eer ’sy zoo.
V’ad geid ass poagey kangaroo.

Nish, ta shin clashtyn, s’olk y faaue,
Dy vel ny rappyn shoh cur raaue.
Oie’ll Verree, t’ad son geid dagh gaih
Tra ta ny paitçhyn foast nyn lhie.
Ec ny maarlee, s’mooar y sthock,
Dagh gioot y Nollick geidit oc.

Ho Ho son ny maarlee
Ny meoiryn shee 's ny maarlee Ho Ho!

Shoh Poleen Pugh ta roie myr mwaagh,
As eh ny ghooinney aghtal.
V’ad gra dy row
Y dooinney braew
Ny veoir shee share dy baghtal.

Ho Ho son ny maarlee
Ny meoiryn shee ’s ny maarlee Ho Ho!

Oie’ll Verree, dooyrt y sessenagh,
“Cha nodmayd ve fegooish!
Cur fys er Pugh,
As eisht dy bieau
Bee jerrey er y chooish.”

“Ta gaihaghyn dy liooar ersooyl.
Cho mooar ta’n loght as creoi,
Ta feme ain er
Y dooinney share.
Ta treisht ain ayns dty schlei.”

Ho Ho son ny maarlee
Ny meoiryn shee ’s ny maarlee Ho Ho!

Agh ayns y valley, she schlei ny maarlee
Va geid dagh nhee bare lesh ny bare lhee.

Trooid y valley, ayns dagh strane
Hie ny rappyn, ’nane lurg ’nane.
Harrish y voalley, as brishey stiagh,
Goaill ny gaihaghyn son cragh.
Stiagh ec uinnag, dorrys, çhimlee,
Fo’n laare. Cha row ad imlee.
V’ad goaill moyrn jeh’n schlei v’oc,
Geid giootyn veih ny paitçhyn boght.

As choud's va ashlish ec ny cloan
Jeh Jishag y Nollick as giootyn ayn,
Cha row fys oc dy row "Naim" Horace
Geid ny giootyn – as "Naim" Maurice.

Ho Ho son ny maarlee
Ny meoiryn shee 's ny maarlee Ho Ho!

Va Glackeyder Jack freayll arrey mie
Agh eisht va greain ry-gheddyn.
She Poleen Pugh
Va roie dy biau!
Hug Jack daue raaue lesh feddan.

Scanshoil va'n leeid, agh eisht – atreih!
Va ny maarlee ayn myr beishtyn keoie.

Va rour jeu ayn, cha daink eh lesh.
V'ad tayrn y boandey ehey. Eisht,

Va'n cullee ehey raipit veih,
As er y traid va Pugh ny lhie.

Harrish hie – ny s'messey na ooilley –
Y carbyd clienney as y spooilley.

Va carbyd clienney lane dy chooid
Ec Mwarree Swagg 'sy raad.
Va'n lught cho mooar,
Va'n reayrt cadjoor
Myr Jishag y Nollick as sleayd.

"Hallo, hallo," as Poleen Pugh,
"Cre t'ou jannoo aynshoh?"
Hug Mwarree Swagg shilley.
"Jus roosteyrys, my ghuilley,"
As ish rish y veoir shee coar.

Ho Ho son ny maarlee
Ny meoiryn shee 's ny maarlee Ho Ho!

Hoie ny maarlee sheese er, lhiattee ry lhiattee.
“Cur seose,” as ad, “as cha jeanmayd assee!”
“Cha nel agh uss noi queig jin, woie!”
(Ren Mwarree Swagg rouailley roe).
Agh dooyrt Poleen Pugh roo lesh gearey,
“Vel shen eh, eisht? Shegin diu goaill nearey!
Va mee cloie – she gamshoge mish –
Agh ta mee son goaill toshiaght nish!”

Eisht lheim eh seose, as er shen hooar
Horace dy row eh kianglt rish billey mooar.

Va Maurice kianglt eisht ayns sack,
As ren Pugh bwoalley Glackeyder Jack.

Dyllee Billy-y-Phoagey, “Shee bannee meel
Ta Pugh cho lajer as lion erbee!
Ta loght gyn vondeish, va Mummig gra!”
As hie eh neal sheese er y laare.

Va Mwarree Swagg foast roie er-çhea
Cha row Greimmeyder Dan cur seose dy rea.
Va Dan son follaghey – honnick Pugh eh dy cleeir.
Va Dan son roie – verr Pugh eh dy Leah.
Va Dan son troggal Pugh seose ’syn aer.
Agh seose lesh Dan ec y dooinney share.
Cheau Poleen Pugh Dan tessyn y traid,
As stiagh ayns thammag, as eisht, aynshid,

Huitt eh, roll eh, woaill eh e vollag;
V’eh ny lhie gyn mioyr liorish trollag.
“Jeant dy mie, trollag!” as Poleen Pugh.
“Bee boyn mie ayd – t’ou slane feeu!”
Eisht haink y sniaghtey – floag ny ghaa,
Snaue dy mial trooid yn aer.

Ho Ho son ny maarlee
Ny meoiryn shee ’s ny maarlee Ho Ho!

Ayns Lunnin, shoh ny meoiryn shee
’Sy stashoon oc, goaill fea.
Ta lhune dy iu.
Da Poleen Pugh
T’ad gyllagh magh, “Huraa!”

Ayns Lunnin, ta ny maarlee shoh
Trimshey ayns pryssoon.
“Cha row eh mish
Va kyndagh rish,”
Ta’n pleadeil oc annoon.

Ho Ho son ny maarlee
Ny meoiryn shee ’s ny maarlee Ho Ho!

As ny gaihaghyn? Oh, v'ad currit er-ash
Liorish Poleen y Nollick 'sy sniaghtey tash.
Ta ny meoiryn shee goll huggey as veih,
Shirrey ben ta foast cho sie,
Ceau fynney shynnee. T'ee shenn dy liooar.
S'mie lhee ceau fainaghyn cleayshey mooar.
Shynney lhee geid cooid erbee.
Ta sack mooar eck, as – bannee mee! –
T'ee foast mitçhooragh, myr v'ee nurree.
She Mwarree Swagg ta'n ennym urree.

Ho Ho son ny maarlee
Ny meoiryn shee 's ny maarlee Ho Ho!